



In mercuri ai 26 de SetèMBER éL gnü sughé l' andata dl 2° turno dla Copa Provincia 2012/2013 de 3° categoria por La Val. La partida é indô gnüda sugada cuntra la squadra da Gsiesertal, fora de ciasa. Dô la buna prestaziun in sabda tla partida de campionat cuntra Gsiesertal é La Val jüs indô a Gsies, mo por portè a ciasa la vitoria.

Sot la plöia á mustrè La Val en bel jüch, al é gnü combatü cina ala fin, mo por la vitoria ne al nia bastè. Ala fin éL saltè fora en bun pareggio 1 a 1. En pareggio che avantajèia La Val, deache le gol segnè fora de ciasa é zigü important, por le ritorno ai 17.11.2012 a La Val dales 20:00.

Bel da mëter man é Gsies che prô da detè i ritmi, mo La Val ne se lascia nia druché massa dô ia. La difesa da La Val é metüda sô bun y ne lascia nia sughé Gsies. Ince i centrocampisc á na gran grinta y é bugn gonot da destrüje le jüch dl Gsies. I dui portiers á püch da fá tl prüm tēp, deache al vëgn scialdi sughé ite a mez, mo al mancia les conclujuns sides dla pert de Gsies co da La Val. Mo ala fin dl prüm tēp é impó ciamò Gsies che fesc le prüm gol. Sôn en calcio d'angolo rôia la pala sôn le prüm palo. Le atacant y le defensur vá cuntra la pala, mo le atacant é bun dala aziché y pasa dlungia le defensur ia. la dedô éL ciamò dui defensurs, mo degügn se aspeta che la pala passa bel avisa tl unico punt che ne é nia cis bun curí. Ince Sepl ne se aspeta nia dailó la pala, insciö rôia la pala te porta. En gol cun na gran desfortüna cuntra La Val.

Le prüm tēp se stlüsc jö sôn le 1 a 0 por Gsies.

Tl secundo tēp éL Ivan che vëgn en pü plü zoruch a daidè i dui centrocampisc, deache le Gsies sugâ cun 3 ite a mez. Insciö se fesc düta la squadra plü saurí y é plü bel curís. Deplü

beles combinaziuns y passaggi danter i centrocampisc mostra che La Val crëi ciamò tla partida. A mesa le secundo tēmp él spo La Val che sfiorëia le pareggio. Sön en calcio d'angolo él Micky ascvelt y tol atira la pala y passa ala fascia. Le portier che é jü a protesté cun le arbiter ne é nia bel te na posiziun otimala. Al röia atira ite le cross, ulache Ivan é bel sú sön le rigore. Cun en bel colp de cé proel da oje ite la pala sön le secundo palo, che ne ê nia corí dal portier. Mo la pala röia bel avisa sön le palo. Na gran sfortüna por La Val.

Mo püch dedô ti garetel impó le gol a La Val. Freddy recuperëia pala ite a mez, spo röiel adalerch Werner. Cun en gran lancio de Werner, che röia sura i defensurs fora, portel Alexander cuntra le portier. Le portier da Gsies fesc na burta uscita y maza sot y sura Alexander. Al arbiter ne ti restel nia ater co mustré sön le rigore y trá fora la cherta cöcena, deache al ê l' "ultimo uomo".

Ivan se prejentëia sön le ünesc y spiazza le portier.

Ala fin dla partida y La Val che á düt tles mans y ne rischiëia nia massa. La partida se stlüsc jö sön le 1 a 1.

Ponsan che le plü vedl te campo pro La Val é dl 84, ai mustрэ düc i sogadusc na gran prestaziun, suradüt na gran "battaglia" cina ala fin.

La foramziun titolara: Sepl Kantioler, Sottara Werner, Castlunger Marco, Vallazza Paolo, Valentin Elmar, Frenes Micky, Sottara Freddy, Sottara Stefan, Moling David, Tschaffert Ivan y Miribung Alexander.

Sostituziuns:

Miribung Adrian por Moling David

Frenes Egon por Miribung Alexander